

文

選

旁

證

文選旁證卷第三十八

長樂梁章鉅撰

卷四十五下 尙書序

尙書序 是時正義已頒故李於此篇及後春秋左氏傳注兩篇皆不復注

孔安國 此東晉梅賾所上僞孔安國序也宋元以來諸儒所辨詳於各書而閻氏若璩古文尙書疏證惠氏棟古文尙書攷論尤審雖毛氏奇齡作古文尙書冤詞其第七曰書序之冤終不能以強詞奪也若蕭選時則固以爲真矣 四庫全書提要云孔傳之依託自朱子以來遞有論辯至 國朝閻若璩作尙書古文疏證其事愈明其灼然可據者梅賾尙書考異攻其注禹貢瀍水出河南北山一條積石山在金城西

南羌中一條地名皆在安國後朱彝尊經義考攻其注書序
東海駒駟扶餘駟貂之屬一條謂駒駟王朱蒙至漢元帝建
昭二年始建國安國武帝時人亦不及見若璩則攻其注泰
誓雖有周親不如仁人與所注論語相反又安國傳有湯誓
而注論語予小子履一節乃以爲墨子所引湯誓之文皆證
佐分明更無疑義至若璩謂定從孔傳以孔穎達之故則不
盡然考漢書藝文志敘古文尙書但稱安國獻之遭巫蠱事
未立於學官不云作傳而經典釋文敘錄乃稱藝文志云安
國獻尙書傳遭巫蠱事未立於學官始增入一傳字以證實
其事又稱今以孔氏爲正則定從孔傳者乃陸德明非自穎
達惟德明於舜典下注云孔氏傳亡舜典一篇時以王肅注
頗類孔氏故取王注從慎微五典以下爲舜典以續孔傳又

云曰若稽古帝舜曰重華協于帝十二字是姚方興所上孔氏傳本無阮孝緒七錄亦云方興本或此下更有澹哲文明溫恭允塞元德升聞乃命以位凡二十八字異聊出之於王注無施也則開皇中雖增入此文尙未增入孔傳中故德明云爾今本二十八字當爲顓達增入耳梅賾之時去古未遠其傳實據王肅之注而附益以舊訓故釋文稱王肅亦注今文所解大與古文相類或肅私見孔傳而秘之乎此雖以末爲本未免倒置亦足見其根據古義非盡無稽矣

三墳五典八索九邱 左傳正義引賈逵曰三墳三皇之書五典五帝之書八索素王之法九邱亡國之戒墳大也言三皇之大道孔子作春秋素王之文也又延篤引張平子說三墳三禮禮爲人防爾雅曰墳大防也三禮天地人之禮也五典

云三墳三氣陰陽始生天地人之氣也五典五行也八索八卦九邱九州之數也案三氏之說不同而劉熙釋名又以爲墳分也論三才分天地人之始其體有三也典鎮也制教法所以鎮定上下差等有五也索素也著素王之法若孔子者聖而不王制此法者有八也邱區也區別九州之土氣教化所宜施者也說亦異而要皆在僞孔傳之前

懼覽之者不一 匡謬正俗云孔安國古文尙書序云先君孔子生於周末觀史籍之煩文懼覽者之不一遂乃定禮樂明舊章覽者謂習讀之人猶言學者爾蓋思後之讀史籍者以其煩文不能專一將生異說故刪定之凡此數句文對旨明甚爲易曉然後之學者輒改之字若者字上云覽之者不一

雖大意不失而顛倒本文語更凡淺又不屬對亦爲妄矣今有晉宋時書不被改者往往而在皆云覽者之不一

足以垂世立教又示人主以軌範也 毛本脫立字主字

坑儒 敖氏英綠雪亭雜言云秦始皇坑儒只是掩其不知而加害非真掘土而爲坑也不然白起坑降卒四十萬於長平項羽坑降卒二十萬於新安設使掘土爲坑若是其廣大彼降卒豈不知之又豈肯帖然束手而就死乎

我先人用藏其家書于屋壁 漢書藝文志注家語云子襄畏秦法峻急藏尙書于屋中而漢記尹敏傳云孔鮒所藏二說不同未知孰是王肅曰子襄名騰陳氏樸書集傳纂疏云鮒騰兄弟爾藏書必同謀謂鮒藏可也謂騰藏可也案隋志及釋文稱爲孔子末孫孔惠所藏然史記孔子世家漢書孔光

傳及家語後序孔子末孫無孔惠之名毛氏奇齡以爲子襄
子孔忠之譌亦無所據

百篇之義世莫得聞 朱氏彝尊曰今文尙書伏生所授止二
十八篇故漢儒以擬二十八宿然史記漢書俱稱伏生以二
十九篇教于齊魯之間馬班古之良史不應以非生所授之
泰誓雜之其中也竊疑生所教二十九篇其一篇乃百篇序
也然百篇之說厯攷今古文終不符合至於百兩篇者張弼
僞書與鄭注三十四篇逸書二十四篇毫無干涉

聖魯共王好治宮室 至乃不壞宅悉以書還孔氏 案魯共王
壞宅之說厯見漢書藝文志荀悅漢紀袁宏後漢紀諸書而
王肅家語後序云子國少受尙書于伏生又云天漢後魯共
王壞孔子宅得壁中詩書悉以歸于子國又云子國年六十

卒於家子國安國字也史記儒林傳伏生於孝文帝時年已九十餘矣自文帝元年至天漢元年凡七十九年而安國年止六十若上見伏生則不能及天漢下及天漢後其王壞宅事則上溯伏生之受尙書年益不符閻氏若璩云魯恭王以孝景前三年丁亥徙王魯徙二十七年薨則當在武帝元朔元年癸丑是時武帝卽位甫及一十三年班書志謂武帝末魯恭王壞孔子宅者已屬舛誤魯恭已薨于元朔元年下距天漢尙有二十八年今云天漢後壞壁不已悖哉

爲隸古定更以竹簡寫之 匡謬正俗云言以孔氏壁中科斗文字依傍伏生口傳授者考校改定之易科斗以隸古字定訖更別以竹簡寫之非復本文也近代淺學乃改隸古定爲隸古字非也

增多伏生二十五篇又並序凡五十九篇爲四十六卷又承詔爲五十九篇作傳又定五十八篇郝氏敬尙書辨解云班固劉向第云安國獻書未言詔安國爲傳也云多伏生十六篇無三十五篇也閻氏若璩曰一則曰得多十六篇再則曰逸書十六篇是古文尙書篇數之見于兩漢者如此東晉元帝時豫章內史梅賾忽上古文尙書增多二十五篇無論其文辭格制迥然不類而只此篇數之不合僞可知矣

其餘錯亂摩滅不可復知七經孟子攷文云異本摩作磨案說文無磨字正義本不作弗

傳之子孫以貽後世正義本作傳子孫孫以貽後代

春秋左氏傳序

春秋左氏傳四庫全書提要云自劉向劉歆桓譚班固皆以

春秋傳出左邱明左邱明受經于孔子魏晉以來儒者更無
異議至唐趙匡始謂左氏非邱明蓋欲攻傳之不合經必先
攻作傳之人非受經於孔子與王柏欲攻毛詩先攻毛詩不
傳於子夏其智一也宋元諸儒相繼竝起王安石有春秋解
一卷證左氏非邱明者十一事陳振孫書錄解題謂出依託
今未見其書不知十一事者何據惟朱子謂虞不臘矣爲秦
人之語葉夢得謂紀事終於智伯當爲六朝時人似爲近理
然考史記秦本紀稱惠文君十二年始臘張守節正義稱秦
惠文王始效中國爲之明古有臘祭秦至是始用非至是始
創闢若璩亦駁此說曰史稱秦文公始有史以記事秦宣公
初志閏月豈亦中國所無待秦獨創哉則臘爲秦禮之說未
可據也左傳載預斷禍福無不徵驗蓋不免從後傳合之惟

哀公九年稱趙氏其世有亂後竟不然是未見後事之證也
經止獲麟而弟子續至孔子卒傳載智伯之亡殆亦後人所
續史記司馬相如傳中有揚雄之語不能執是一事指司馬
遷爲後漢人則載及智伯之說不足疑也今仍定爲左邱明
作以祛衆惑至其作傳之由則劉知幾躬爲國史之言最爲
確論疏稱大事書於策者經之所書小事書於簡者傳之所
載觀晉史之書趙盾齊史之書崔杼及甯殖所謂載在諸侯
之籍者其文體皆與經合墨子稱周春秋載杜伯燕春秋載
莊子儀宋春秋載祈觀率齊春秋載王里國中里聚其文體
皆與傳合經傳同因國史而修斯爲顯證矣漢志載春秋古
經十二篇經十一卷注曰公羊穀梁二家則左氏經文不著
於錄然杜預集解序稱分經之年與傳之年相附比其義類

各隨而解之陸德明釋文曰舊夫子之經與邱明之傳各異杜氏合而釋之則左傳又自有經考漢志之文旣曰古經十二篇矣不應復云經十一卷觀公穀二傳皆十一卷與經十一卷相配知十一卷爲二傳之經故有是注徐彥公羊傳疏曰左氏先著竹帛故漢儒謂之古學則所謂古經十二篇卽左傳之經故謂之古刻漢書者誤連二條爲一耳今以左傳經文與二傳校勘皆左氏義長知手錄之本確於口授之本也言左傳者孔奇孔嘉之說久佚不傳賈逵服虔之說亦僅偶見他書今世所傳惟杜注孔疏爲最古杜注多強經以就傳孔疏亦多左杜而右劉篤信專門之過不能不謂之一失然有注疏而後左氏之義明左氏之義明而後二百四十二年內善惡之跡一一有徵後儒以私臆談褒貶者猶得據傳

文以知其謬則漢晉以來藉左氏以知經義宋元以後更藉左氏以杜臆說傳與注疏均謂有大功於春秋可也

杜預 六臣本作杜元凱是也

春秋者魯史記之名也 姜氏皋曰左昭二年傳見易象與魯春秋公羊成十五年傳春秋內其國而外諸夏禮坊記故魯春秋記晉喪又魯春秋猶去夫人之姓是皆以春秋屬之魯矣然晉語羊舌肸習於春秋楚語申叔時論傳太子之法云教之以春秋晉楚當以乘與檣柁名而亦曰春秋墨子非鬼篇又有周之春秋燕之春秋宋之春秋齊之春秋豈列國之史皆曰春秋乎或曰春秋者史記大共之名故釋名云春秋書人事卒歲而究備春秋言溫涼中象政和也亦不專指一國惟孔疏云晉楚皆私立別號魯則守其本名

與周之所以王也 六臣本正義本皆無也字

韓子所見 正義本所見下增魯春秋三字按此作注之辭虛

氏文弘據以補正文恐非

諸所記注 釋文云注字或作註阮先生日記註字當從言通

俗文日記物曰註方言廣雅皆有註字乃俗字之最古者

其餘皆卽用舊史 六臣本正義本皆上並有則字

左邱明受經於仲尼 正義據沈氏云熾氏春秋引觀周篇曰

孔子將修春秋與左邱明乘如周觀書於周史歸而修春秋

之法邱明爲之傳

優而柔之使自求之歷而飢之使自趨之 正義云優而柔之

使自求之大戴禮子張問入官學之篇有此文也其歷而飢

之則未知所出

而義起在彼 六臣本作而義起於彼

諸所諱避 六臣本諱避作避諱正義本避作辟

若此所論 六臣本正義本此並作如

今其遺文可見者十數家 隋書經籍志春秋經十一卷吳士

變注春秋左氏長經二十卷漢賈逵章句春秋左氏解詁三

十卷賈逵撰春秋左氏傳解詁三十一卷漢服虔注春秋左

氏傳十二卷魏王朗撰又春秋左氏經傳朱墨列一卷賈逵

撰春秋左氏傳條例九卷漢鄭眾撰春秋左氏膏肓釋病十

卷服虔撰春秋左氏達義一卷漢王玢撰春秋左氏釋陵一

卷王朗撰釋文敘錄注解傳述人在杜氏前者僅載士變賈

逵服虔王肅董遇五家之書而考兩漢儒林傳又云賈逵作

左氏長義左氏訓詁陳元作左氏同異鄭眾作左氏條例章

句馬融爲三家同異之說延篤彭汪均作注許淑服虔孔嘉
王朗王基輩遇周生烈並注解左氏傳李仲欽作左氏指歸
潁容作春秋條例又何休作膏肓鄭康成作鍼膏肓凡一十
九家正義云此至杜時或在或滅不知杜之所見十數家定
是何人也

有所不通 六臣本有作其

然劉子駿創通大義賈景伯父子許惠卿皆先儒之美者也末
有潁子嚴者雖淺近亦復名家 漢書楚元王傳劉歆字子駿
向少子治左氏引傳文以解經經傳相發明由是章句義理
備焉後漢書賈逵字景伯扶風人父徽字元伯受業於歆作
春秋條例逵傳父業作左氏傳訓詁許惠卿名淑魏郡人也
潁子嚴名容陳郡人也釋文敘錄元伯作春秋條例二十一

卷述作訓詁外別有左氏長義隋志作長經是也

說者以爲仲尼自衛反魯正義本脫爲字

麟鳳五靈正義云麟鳳與龜龍白虎五者神靈之鳥獸王者

之嘉瑞禮記禮運言四靈而杜欲徧舉諸瑞故備言五靈也

五靈之文出尚書緯

絕筆於獲麟之一句者又然則春秋六臣本無者字則字

卽魯隱也六臣本卽作則

子路使門人爲臣六臣本正義本使上並有欲字

三都賦序

注左思作三都賦世人未重皇甫謐有高名於世思乃造而示之何曰世說注此序及劉注卽太冲所自爲蓋託之勝流以

重其價也按太冲賦序其卒章曰聊舉一隅攝其體統歸之

翻詰則注明是太沖所爲又魏都賦註或云張載今文選中仍題劉逵參差不合孝標之言未爲無據

將以紐之王教

又

子夏序詩曰

六臣本紐作贊無曰字

是以孫卿屈原之屬

荀子有禮智雲蠶箴五賦漢書藝文志

屈原賦二十五篇

注

西都賦序曰

西當作兩各本皆誤

其文博誕空類

姜氏皋曰類字羣籍所釋與此文義均不相

符疑當作類字解左昭二十八年傳忿類無期老子河上夷

道若類釋文均曰類疵也又曰類本作類

注

孔安國尙書大傳曰

大字不當有各本皆衍

廣夏接模

五臣夏作夏翰注可證

注

煥乎其有文章也

今論語無也字漢書儒林傳敘傳陳書

文學傳論衡齊世篇唐文粹柳冕書引均有也字

而魏以交禪比唐虞既已著逆順注甚誘逆之理六臣本魏

下有氏字已作以陳校注申誘改諄逆下添順字

又因客主之辭六臣本無主字

思歸引序

思歸引 通志樂畧云思歸引亦曰辭拘操舊說衛賢女之所
作也邵王聞其賢而聘之未至而王死太子留之不聽拘于
深宮思歸不得援琴而歌曲終乃縊初但有聲至石崇始作
辭但述其思歸河陽故居而已

爲好林藪遂肥遯於河陽別業 世說新語載石季倫金谷詩

序曰有別廬在河南縣界金谷澗中去城十里有田十頃或
高或下有清泉茂林聚果竹柏藥草又有水碓魚池土窟其

爲娛目歡心之物備矣

百木幾於萬株

又多養魚鳥

六臣本百作栢魚鳥作烏魚

家素習技

余曰續文章志崇後房百數皆曳統繡珥金翠綵

竹之藝盡一世之選

今爲作歌辭

又而播於絲竹也

六臣本歌作樂無於字

卷四十六

豪士賦序

注

及齊亡作豪士賦

此臧榮緒晉書語也翰注機惡見齊王

問自矜其功有篡位之心因此賦以諷之終不寤矣按晉書

陸機傳云問既矜功自伐受爵不讓機惡之作豪士賦以刺

焉問不之悟而竟以敗是作此賦時齊猶未亡也篇末借使

伊人頗覽天道云云語意顯然臧榮緒所云殊誤

循心以爲量者

又落葉俠微風以墮又孟嘗遭雍門而泣

六

臣本晉書循並作修風並作颺晉書而作以

不足繁哀響也何校繁改煩陳同據晉書也

斗符可以定烈士之業六臣本下有言過時也四字

蓋得之於時勢也又任出才表者哉又有生之所大期六臣

本無也字者字晉書脫所字

況乎代主制命自下財物者哉晉書代作世誤五臣財作裁

向注可證毛本財作裁裁作乎據晉書改

忠臣所爲慷慨晉書爲作以

是以公爽鞅鞅不悅公旦之舉五臣鞅鞅作快快濟注可證

晉書亦作快快毛本據改何曰時王豹致箋於問亦引周公

流言爲戒

非其然者與六臣本無者字

登帝天位 尤本及六臣本校語皆改天作大誤也

注 尚書曰太甲 書下當有序字各本皆脫

懼萬民之不服 晉書民作方避唐諱改

眾心日侈 注 直氏 說文墜落也从阜多聲玉篇墜徒可切落

也壞也山崩也廣韻三十三帶墜下坂兒又落也四紙墜山

崩也說文大可切皆無作直氏切者按廣韻以墜入紙韻則

直氏切正其音也

而方偃仰瞪焉 六臣本無方字晉書焉作吁

忘已事之已拙 尤本及六臣本忘作亡誤也

夫蓋世之業名莫大焉震主之勢位莫盛焉 又俯冠來籍 晉

書無大焉震主之勢位莫八字當是誤脫冠作觀亦誤

注 爾雅注曰劭美也 六臣本作小雅曰是也此引廣諸語

彼之必昧又故聊賦焉 晉書彼上有而字聊下有為字

顏延年三月三日曲水詩序

注三月上已至祓除不祥也 後漢書禮儀志是月上已官民

皆絮於東流水上曰洗濯祓除去宿垢疢為大絮注引蔡邕

曰論語暮春者春服既成冠者五六人童子六七人浴乎沂

風乎舞雩自上及下古有此禮今三月上已祓禊於水濱蓋

出於此張氏雲璈曰是猶用已日後乃但以三月三日為上

巳沈約宋書禮志以為自魏始也

注晉武帝問書摯虞曰 陳校書下添郎字

注三月曲水 胡公攷異曰月當作日各本皆誤藝文類聚初

學記引作日晉書束皙傳亦然

注平原徐肇 何曰續漢書禮儀志注徐肇作郭虞

注立爲山水 何校水下添祠字

固萬樂而爲量者也 六臣本無也字非也

注景光景連屬也 光上當有屬字各本皆脫

宗漢之兆在焉 良注宋爲漢後故云宗漢

注周易曰蠱君子以振民毓德 今易毓作育釋文引王肅本

作毓云毓古育字說文育从云肉聲重文爲毓

注四隩既澤 六臣本澤作宅是也

則擇之於茂典 尤本擇誤作宅何校改

注尙書武王曰 六臣本武作穆是也

注楚穆仲謂宣王曰 楚當作樊各本皆誤

注謝承後漢書曰魏朗爲河內太守明密法令 案此一則姚

氏之駟輯謝書未錄別引一則作河南太守攷後漢書志河

南當稱尹不曰太守范書魏朗本傳亦作河內也

烈燧千城 胡公攷異曰烈當作列各本皆誤

增類帝之官 六臣本官作壇

注王仲宣思征賦曰 胡公攷異曰思征當作征思

以惠庶萌之願 五臣萌作氓良注可證

其上已之儀 余曰拾遺記周昭王溺於江漢二女延娟延娛

夾擁王身同沒焉故江漢之人到今思之至春上已之日褰

集祠問何曰顧亭林云季春之月辰爲建巳爲除故用三月

上巳祓除不祥古人謂病愈爲巳亦此意也周公謹以爲戊

巳之巳者非按古人上下辛皆取十幹亭林之說疑非

注閼水以成川 胡公攷異曰閼上當有川字各本皆脫

淵旋雲被 六臣本旋作放

注魚鼈及魚 今詩韓弈及作鮮

注說文曰緇繁彩色也 段校色改飾

煥衍都內者矣 又展詩發志 六臣本內作會發作登

王元長三月三日曲水詩序

文藻富麗當代稱之 南齊書王融傳上幸芳林園禊宴朝臣

使融爲曲水詩序文藻富麗當世稱之後日宋弁於瑤池堂

謂融曰昔觀相如封禪以知漢武之德今覽王生詩序用見

齊王之盛

時乘旣位 案下句御氣引莊子則此當引易時乘六龍

我大齊之握機創厯 何曰握機二字本建武泰山石刻文昔

在帝堯聰明密微讓與舜庶後裔握機

注維十月五祀 六臣本月作有是也

注 尚書璇璣玉鈐曰 胡公攷異曰玉字衍各本皆衍

注 充天之對 今本逸周書作兌天之對

注 制作六經洪業 陳校業下添也字各本皆脫

牢籠天地彈壓山川 古文苑載北周万紐于瑾華嶽頌云敍
智之所牢籠英威之所彈壓

注 世祖立皇太子長楸 何校楸攷懋陳同按楸當作楸各本
皆以形近而譌耳

跨掩昌姬韜軼炎漢 六臣本掩作蹶林先生曰韜字當作躡
字之誤謹案此五臣作韜銑注藏也可證

注 帝王子弟 胡公攷異曰帝上當有高字各本皆脫

注 秦后太子來仕 又王仕於晉也 何校去太字王攷來陳同
各本皆有衍誤

注譙周考史曰 陳校考史攷古史各本皆誤

歲時於外府 五臣時作貢翰注可證

辨氣朔於靈臺 注左氏傳曰公既視朔遂登觀臺以望而書雲

物 趙氏曦明曰續漢志曰候氣之法殿中用玉律十二惟二

至乃候靈臺用竹律六十候曰如其律注引左傳不合

影搖武猛 注爲嫖姚校尉 嫖當作票案史記作剽姚漢書作

票姚荀紀作票鷁師古音頻妙羊召反以讀平聲爲不當其

義惟服虔音飄搖此作影搖蓋從服說

注丁白爲武猛校尉 何校白攷原陳同據後漢書何進傳也

各本皆誤

繳大風於長隧 注許慎曰大風風伯也 林先生曰按淮南高

誘注以大風爲鷁鳥或謂飛廉爲風伯而漢書注謂飛廉鹿

頭鳥身豈風伯本近鳥形而飛廉實卽風伯歟謹案今淮南子本經訓高注大風風伯也能壞人屋舍無以大風爲鷲鳥之說考廣宏明集十一風作鳳疑鷲鳥之說或出於彼耳

注王謂晉文侯曰段校侯改公

注尙書曰無或攘攷按今書無此語當卽費誓毋敢寇攘之

注說文曰桴鼓柄也今說文桴擊鼓杖也

侮食來王注古本作晦食周書曰東越侮食困學紀聞十九

云周書王會解東越海食或誤爲侮食元長用之其別風淮雨之類乎盧氏文弨曰食卽蛤字選注以形近而訛

注高誘淮南子注曰反踵國名其人南行跡北向也今淮南子無此注墜形訓有跂踵民高注踵不至地以五指行也

注山海經曰有黃胸國其人胸有竅括地圖曰禹平天下會于
食稻之野又南經防風之神弩射之有迅雷二神恐以刃自貫
其心禹哀之乃拔刃療以不死之草皆生是爲黃胸之民按
所引山海經今在海外南經所引括地圖與藝文類聚九十
六所引畧同今按海外南經郭注引尸子曰四夷之民有黃
胸者有深目者有長膝者黃帝之德常致之竹書亦云黃帝
五十九年黃胸氏來賓是黃帝時卽有黃胸國防風以刃自
貫之說殆未可信矣

注文鉞未詳一曰鉞當爲越按注此下又引杜篤論文越云
云則似從越爲優且與奇幹句相配也

奇幹善芳之賦六臣本幹作翰

執牛露犬之玩孫氏志祖曰執當作執逸周書王會解卜盧

以牝牛王應麟補注云紉與綵同

注肅慎氏貢楮矢石弩 馮氏景曰肅慎氏地今甯古塔東去

一千里曰混同江江邊榆樹松樹枝既枯墜入爲波浪所激
盡不知幾何年化爲石可以爲箭鏃榆爲上松次之西南去
六百里爲長白山山顛之陰及黑松林徧生楮木可取爲矢
質堅而直

注渠搜獻鼯犬鼯犬露犬也 姜氏皋曰周書王會解鼯作鼯

說文鼯胡地風犬廣韻鼯比教反能飛食虎豹之屬卽此

廐廐相尋 五臣廐廐作軌躅銑注可證陳曰據注廐當作廐

廐草華 又封山紀石 六臣本孽作滋石作號

注禮記逸禮曰 又孔子某 六臣本無下禮字胡公攷異曰禮

記逸禮似當作逸禮記子字應去各本皆有誤衍

注 譽猶豫古字通 猶當作與各本皆誤

袂飲之曰在茲 林先生曰袂有春袂秋袂此及蘭亭序所云
春袂也丹鉛錄云馬融西第頌西北戌亥元石成輪蝦蟇吐
瀉庚辛之域劉楨魯都賦素秋二七元漢指闕人胥袂袂國
千水嬉此秋袂也野客叢書云觀漢書八月袂於灞上知漢
人袂除亦有在秋間者不必春莫也

乃瞻芳林 余曰南朝宮苑記芳林園一名桃花園本齊高帝
舊宅在秦淮大路上

注 十洲記曰又齊有天子 又名曰風涼 胡公攷異曰洲當作

州于當作下風涼當作涼風涼風見淮南子墜形訓卽離騷
之國風史記惠王闔索隱云系本名毋涼是涼間通用也

注 陳陳殷殷無不載悅 又輒輒啟啟莫不載悅 張氏雲璈曰

按呂覽慎人篇振振殷殷無不載悅李氏兩引此書而皆不
同未詳所本字書亦無啟字按廣韻十九臻引呂氏春秋注
殷殷動而喜悅兒一先引呂氏春秋天子轉聘啟啟莫不載
悅十六軫轉轉啟啟喜悅兒皆與呂覽今本不同亦與李注
異畢氏沅云此所云或呂覽別本也說文欠部有欣字云指
而笑也然則从文从攴皆非

亂嚶聲於絲羽 五臣絲作錦銑注可證

式道執攴 五臣式作戒銑注可證案注引漢書則五臣誤

揚葭振木 林先生曰葭當與箊同樂部箊似箊栗無箊以銅

爲之通雅云唐之銅箊是其遺也朱氏珔曰葭已見前李陵
答蘇武書此云用銅爲異意者箊本捲蘆葉而吹之爲塞上
之物後人以之入樂部乃仿其製而以銅爲之歟

貝冑星羅 五臣羅作離向注可證

絕景遺風之騎 五臣遺作追銑注可證

注說文𧈧𧈧羣車聲也 今說文𧈧字不重

金胞在席 又正歌有闕 六臣本胞作匏正作清

王文憲集序

公諱儉字仲寶 樂史廣卓異記云晉書王導以下至王褒九

世皆有史傳如儉子仲寶仲寶子規云云案仲寶爲儉字此

可證儉子騫騫子規規子褒史可證樂史誤也

海內冠冕 六臣本句首有爲字

注晉中興書曰王祥弟覽生導 本書爲蕭楊州作薦士表注

引同與晉書覽生裁裁生導不合

注潁陽人也 陳校潁改頻各本皆誤

體三才之茂踐得二之機 六臣本茂下有典字機作幾上有

庶字

注垂芒謂發秀也精星也 此九字係銑注尤本錯入六臣本

無而有生於豐通於制度七字是也

注觀海有術 今孟子海作水

注呂氏春秋曰相劍者曰白所以爲紉也黃所以爲堅也黃白

雜則堅且紉 今呂氏春秋別類篇白所以爲堅也黃所以爲

物也按物與紉古字可通而以堅屬白以物屬黃與此顯異

今本呂氏春秋下又難者曰白所以爲不物也黃所以爲不

堅也又與此同

注無不制在情衷 情當作清

人倫以表 又匠者何工 六臣本以作異尤本毛本脫工字

自咸洛不守 五臣咸作函濟注函函關謂長安洛洛陽也

賀生達禮之宗 林先生曰按南齊書儉長於禮學諳究朝儀

每博議證引先儒罕有

注 潁川荀顗 陳校顗攷閩據晉書諸葛恢傳也

齒危髮秀之老 注 髮秀猶秀鬢也 朱氏珔曰方言云鬢老也

東齊曰省郭璞注言秀鬢也此李注所本然髮與鬢異詩以

介鬢壽鄭箋云毫鬢也人年老者必有毫鬢秀出如髮則既

老不應有秀出者此秀字當本禿字以形似致訛風俗通曰

五月忌翻蓋屋瓦令人髮禿是髮禿二字固有成語也

注 董安于之心緩 何校心改性陳同各本皆誤

與公母武康公主 王氏志堅曰南史王僧綽傳尙東陽公主

而儉傳及此文皆作武康巫蠱事中絕無武康名不知何故

楊氏鳳苞曰初封武康進封東陽林先生曰武康卽東陽也
褚彥回所尙之主南史以爲南獻王儉碑以爲餘姚亦緣公
主之號不一耳

有詔廢毀舊塋 六臣本廢毀作毀發

以選尙公主 六臣本校云選善作選誤也

注 刪除頗重 陳校頗改頗各本皆誤

更撰七志 余曰隋志七志七十卷封演聞見記儉撰七志有

經典志諸子志文翰志軍書志陰陽志術藝志圖譜志

脫落塵俗 六臣本塵俗作風塵

衣冠禮樂在是矣 六臣本樂下有盡字

出爲義興太守 林先生曰按南齊書褚曄暴虐儉憂懼哀樂

求引出晉新安王璿王獻之爲吳興例補義興太守

昔毛玠之公清

又

齊臺初建

六臣本公清作清公初作既

以佐命之功

林先生曰按南齊書時大典將行儉爲佐命禮

儀詔策皆出於儉

身營郤分司

注

今以策劭爲營郤誤也

陳曰據此注則正文

營郤當作策劭又曰注中策劭當作榮郤後漢書百官志及

魏志賈詡傳皆可證胡公攷異曰注中所云營役瓊切郤烏

合切者爲漢官儀作音以明其不同作策劭也

注

獻帝建始四年

陳校始改安各本皆誤

鎮國將軍

六臣本國作軍

注

左氏傳今譬於草木寡君之臭味也朱氏珔曰今傳文作

寡君在君君之臭味也卽節引亦當重一君字方晰

領國子祭酒

林先生曰按南齊書儉十日一還學監試諸生

巾卷在庭

挂服捐駒

注

挂服未詳

翰注

魏裴潛爲兗州刺史嘗作一胡

床及去留挂於官第凡所用物必皆呼爲服也按此事見魏志裴潛傳然以床爲服終有未安耳惟後漢書逢萌解冠挂

東都城門事較近

師友之義

林先生曰南齊書舊太子敬二傳同至是朝識接

少傳以賓友之禮

注

諸葛亮與杜徽書曰朝廷年十八

何校徽改徵陳同各本

皆誤尤本朝廷年作今年始亦誤

注

或發怨於見奪

尤本怨作志案當作志

公提衡惟允一紀於茲

林先生曰儉年二十八領吏部至卒

年三十八故云一紀

注孫綽王蒙諫曰 陳校蒙政濫各本皆誤

注燕丹太子曰 胡公攷異曰太字不當有各本皆衍

春秋三十有八 南史王儉傳永明七年儉薨年四十八而南

齊書王儉傳與此合林先生曰儉襲豫甯侯南史齊書並云
數歲其爲秘書郎南史云年十八其領右僕射吏部南史齊
書並云年二十八其卒在永平六年二史並同則正年三十
八也南史偶誤耳

工女寢機

又

故以痛深衣冠

六臣本工作功無以字

增班劍六十人 六臣本六上有爲字姜氏舉曰大唐開元禮
云漢制帶劍晉代以來謂之班劍宋齊謂之象劍今觀此序
則齊亦謂之班劍與注引漢官儀者不同

居身以約

林先生曰按南齊書儉寡嗜慾惟以經國爲務車

服塵素家無遺財

注齊春秋曰何校齊上添吳均二字各本皆脫

注太尉范滂陳校尉下添據字各本皆誤脫

注檀道鸞晉陽秋曰陳校晉上添續字

注夫子善誘人此節引去循循然三字

功成作樂六臣本作作改

注謝安石上疏曰陳校去安字各本皆衍

一眇之榮鄭璞踰於周寶六臣本眇作面按璞當作樸注同

胡公攷異曰物之質謂之曰樸玉樸亦然故說文玉部並無

璞字而鼠璞得與之同名異寶也

注曹植祭橋元文曰陳曰祭橋元文乃魏武事在建安七年

于建時方十歲胡公攷異曰蓋本作魏太祖不知者誤改

注十州記曰崇禮閣 毛本州誤作洲閣當作門

注吾入廟 陳校吾改君各本皆誤

注說文曰緝繁也彩色也 上也字衍此與今說文合

昉嘗以筆札見知 南史任昉傳王儉每見其文必三復曰自
傅季友以來始復見於任子于是令昉作一文及見曰正得
吾腹中之欲乃出自作文令昉點正昉因定數字儉撫几歎
曰後世誰知予定吾文其見知如此

思以薄技効德 六臣本無思字

爲如千秩如千卷 六臣本無如千秩三字案秩當作秩

所撰古今集記 余曰隋經籍志喪服古今集記三卷齊太尉

王儉撰

爲一家言 六臣本言上有之字

文選旁證卷第三十九

長樂梁章鉅撰

卷四十七 聖主得賢臣頌

注 詔爲聖主得賢臣頌 汪氏師韓詩學纂聞云頌者詩之一

體而此頌及韓文公伯夷頌皆不用韻因思周頌之文多有求其韻而不得者後儒強爲叶之恐是本無韻也

敢不畧陳愚心而抒情素 六臣本陳下有其字漢書王褒傳脫心字抒作抒按作抒是也各本作抒皆筆誤

鑄千將之璞 六臣本漢書璞並作模是也

清水淬其鋒 漢書淬作焠按注引三蒼解詁焠作刀鑿也則

正文亦當作焠說文焠堅刀刃也從火卒聲繫傳引此語

越砥歛其鏑 注 說文云鏑劒刃也 漢書鏑作矟師古曰矟刃

旁也今說文無鐸字刀部剗刀劍刃也段校鐸作剗

忽若雪泥畫塗注塗路也漢書鐸作彗師古曰塗泥也如以

帚掃泥灑之地以刀畫泥中言易也

雖崇臺五層漢書層作增

及至駕齧膝孟康曰良馬低頭口至過膝故曰齧膝

韓哀附輿注世本云韓哀侯作御也何曰世本韓哀無侯字

宋衷曰韓哀韓文侯也

注此復言之胡公攷異曰之當依漢書注改作卽宋衷注

縱騁馳驚漢書及蜀志卻正傳引縱馳騁驚

逐遺風林先生曰呂氏春秋有遺風之乘上林賦乘遺風王

氏念孫曰師古曰言馬行尤疾每在風前故遺風於後今此

言逐遺風則是風之遺逸在後者馬能逐及也案此說甚迂

追奔電逐遺風奔遺皆疾意也鄭注攷工記弓人曰奔猶疾也遺讀曰隧隧風疾風也大雅桑柔篇曰大風有隧有隧者狀其疾也楚辭九歌衝風起兮橫波王注曰衝隧也遇隧風大波涌起是古謂疾風爲隧風也隧與遺古通聲而通用小雅角弓篇莫肯下遺荀子非相篇遺作隧南山經旄山之尾其南有谷曰育遺遺或作隧皆其證揚雄傳輕先疾雷以馭遺風楚辭九章悲江介之遺風義並與此同呂氏春秋本味篇馬之美者遺風之乘亦以其疾如隧風而名之非謂行在風前也李注曰遺風風之疾者於義爲長

注當暑紵絺綌 論語釋文紵本又作紵唐石經亦作紵今論語集註本自作紵與曲禮鄭注引同義疏本別作紵足利本同按廣韻紵單衣或作紵同又云紵單也若今本紵字說文

解爲元服玉篇訓爲緣蓋本儀禮鄭注也孟子被衽衣趙注云畫衣是古無訓衽爲單者釋常談引作當暑續帑絺絺然則衽續同作衽亦得

襲狐貉之煖者不憂至寒之淒滄 漢書狐貉作貉狐六臣本及漢書滄作滄姜氏舉曰說文滄寒也欠部滄寒也周書周祝解天地之間有滄熱列子湯問日之初出滄滄涼涼從滄枚乘上書曰欲湯之滄絕薪止火則從滄段氏玉裁曰與水部之滄音義皆同然滄自有初亮切也

亦聖王之所以易海內也 漢書王作主六臣本無也字

躬吐握之勞故有圓空之隆 又甯戚飯牛 又諫評則見聽 漢

書握作提六臣本及漢書圓作圉戚作子漢書則作卽

虎嘯而谷風冽龍興而致雲氣 六臣本虎上有故字無谷字

氣字本書嘯賦注引同漢書亦然惟風冽作冽風

蟋蟀俟秋吟蟀游出以陰 六臣本俟作候漢書蟀作蝻師古

曰字亦作蝻其音同

俊父將自至又伊尹呂望之臣 漢書父作艾無之臣二字

穆穆列布毛本列布作布列

雖伯牙操籛鐘注晉灼曰籛音迭遞之遞 六臣本籛作號漢

書作遞師古曰琴名是也字既作籛則與楚辭不同不得卽

讀爲號當從晉灼音王氏念孫曰琴無遞鐘之名遞卽號之

謫耳淮南修務篇亦云鼓琴者期於鳴廉修營而不期於濫

習號鐘方氏以智曰籛鐘卽編鐘十六枚而在一簠也

蓬門子彎烏號 六臣本及漢書蓬作逢蓬門子卽孟子之逢

蒙荀子正霸正論呂覽聽言史記龜策傳俱作蓬門龜策傳

集解作逢蒙門子淮南原道訓又作逢蒙子皆一人也

注聲之不常何校聲改擊據漢書注也各本皆誤

千載一會漢書一作壹會作合

沛乎若巨魚縱大壑其得意如此漢書若作如如作若

萬祥必臻漢書必臻作畢臻師古曰臻與臻同

不殫傾耳漢書殫作單傾作頃師古曰單盡極也頃讀曰傾

注史記泄公曰胡公攷異曰陳校泄公當作貫高所校未是

此泄上有脫文耳

何必偃仰誦信如彭祖六臣本誦信作屈申彭祖彭姓封於

大彭名鑣字鏗故楚辭天問亦稱彭鏗以其為彭姓之祖後

人遂稱彭祖史記楚世家集解引吳虞翻云名翦蓋聲之轉

乃莊子逍遙游釋文以為姓鑣名鏗非也彭祖之壽亦言人

人殊神仙傳以爲七百六十七歲荀子終身篇注呂覽情欲
執一諸篇注皆云七百歲莊子釋文引晉崔譔李願注作七
百歲又引世本作八百歲楚辭注亦云事盡至八百歲
煦噓呼吸若喬松 漢書喬作僑

趙充國頌

是討是震 姜氏舉曰震與上臣軍爲韻是作平聲漢書敘傳
聞之者嚮震注震之人反

注言充國屯田非便 尤本非誤作之

鬼方賓服

注世本注曰鬼方於漢則先零戎是也

張氏雲璈

曰商之鬼方周荆楚地大戴禮帝繫篇云陸終氏娶於鬼方
氏史記楚世家陸終子生子六人六曰季連季連芊姓楚爲
芊姓後則鬼方自當在荆楚之地頌乃借以爲喻如下文有

方有虎亦以贊充國耳不得以鬼方卽先零也

亦紹厥後 六臣本後作緒按作緒者與上武爲韻耳顧氏炎武曰古人讀後爲戶正與武叶

出師頌

注征西校尉任尙 余校征上添使字

史孝山

注

王莽末沛國史岑字孝山

又蓋有一史岑

陳曰注

中孝山當作子孝按後漢書王隆傳云初王莽末沛國史岑字子孝亦以文章顯莽以爲謁者著頌諫復神說疾凡四篇章懷注云岑一字孝山著出師頌然傳明有字可攷又明列所著四篇並無出師頌則明爲莽末之史子孝而非和熹時之史孝山此章懷注之誤不如李注得之翰注亦云文章志及今書七志並云史岑字子孝出師頌史籍無傳惠氏棟云

孝山爲和帝時人出師頌爲鄧氏所作則非子孝矣

五曜霄映 五臣霄作霄濟注可證

昔在孟津 五臣孟作盟向注可證

朔風變楚 六臣本校云楚善作律誤也

況我將軍窮城極邊鼓無停響旗不斃褰 六臣本城作域何

曰羌之初叛揭木負柴非勅敵也故但言其遠且不過鼓無

停響旗不斃褰則勞而無功更在言外

注禮記曰夫鼎者有銘銘者論譏其先祖之德美功烈勲勞而

酌之祭器自成其名焉 今禮記祭統鼎下無者字之下有有

字美作善勞下有慶賞聲名列於天下八字

言念伯舅恩深渭陽 又傳子傳孫顯顯令問 何曰文雖曰頌

其實刺也陶先敗冀西再敗平襄辱國數奔議棄涼州稱引

古烈所以媿之太后臨朝不加之罪反迎拜爲大將軍失政
刑矣篇末云云使自知其非據而思所以善其後也

酒德頌

劉伯倫 晉書劉伶傳未嘗屑意文翰惟著酒德頌一篇

注臧榮緒晉書曰劉伶 六臣本伶作靈是也

萬期爲須臾 晉書注云期一作朝

搢紳處士 注因雜搢紳先生之畧術 胡公攷異曰此有誤也

下引如淳曰縉亦白色不得此作搢與之不相應疑正文自
爲縉故不取搢插爲義否則當有搢縉異同之註

是非鋒起 晉書鋒作蜂注云一作鋒

方捧髀承槽 六臣本槽作糟非也

注劉熙孟子注曰槽者 胡公攷異曰槽當作糟此所引乃糟

食實者之注但取下文之酒槽與此槽字不相涉不知者並改爲槽也謹案周氏廣業云說文蠶蠶蠶也以背行駛於足狀如酒槽以齊俗所名故謂之蠶槽羅願爾雅翼云蠶槽說者以爲齊人曹氏之子所化也益可證槽之爲槽字矣

奮髯踣踞 晉書踣作箕

豁爾而醒 六臣本晉書豁並作悅

熟視不覩泰山之形 又利欲之感情 又如江漢之載浮萍 六

臣本覩作見利作嗜脫浮字

漢高祖功臣頌

相國鄧文終侯沛蕭何 梁氏玉繩曰高帝封蕭何在沛之鄜縣呂后封何夫人文帝封蕭延武帝封蕭慶宣帝封蕭建世成帝封蕭喜是南陽鄧縣通典州郡七注及索隱並言之古

借鄧爲鄘字遂致混亂漢志於南陽之鄧注侯國二字據後來改封書之沛郡鄧下不書侯國者國已除也周禮酒正注鄧白疏云蕭何封於南陽地名臣瓚引茂陵書何封國在南陽鄧水經注二十九鄧縣治故城南臨沔水謂之鄧頭漢高帝封蕭何爲侯國俱誤以蕭何封南陽鄧說文沛之鄘從邑盧聲南陽之鄧從邑贊聲班固十八侯銘文昌四友漢有蕭何序功第一受封於鄧以鄧協何唐人楊巨源詩麒麟閣上識鄧侯賈島詩往歲鄧侯鎮姚合詩鄧侯宅過謙皆沛鄧音嗟之證故以蕭之封在沛者自續郡國志始索隱因之劉肅大唐新語因之以蕭初封沛續封南陽者自通典所引戴規始索隱因之熊忠古今韻會因之卽瑛七修類藁因之以南陽鄧音贊者自說文始孟康師古因之張守節正義稱孫檢

因之董衡新唐書釋音因之以沛郡鄧音嗟者亦自說文始
應劭師古孫檢因之若夫以南陽鄧音嗟者周禮酒正疏及
釋文以沛鄧音贊者文潁何傳注以沛鄧兼二音者左傳襄
元年大邱注譙國鄧縣釋文及師古高紀地志注皆不足信
唐李匡乂資暇錄宋宋祁筆記陸游老學菴續筆記王楙野
客叢書王觀國學林明人如楊慎丹鉛錄焦竑筆乘方以智
通雅陸容菽園雜記近如王士正池北偶談居易錄之類大
抵仍襲前說而辨之不甚明也

曲逆獻侯陽封陳平 六臣本曲區句反逆音遇按曲逆史漢
皆無音漢志曲逆縣屬中山莽曰順平張晏注濡水於城北
曲而西流故曰曲逆郡國志云章帝醜其名改蒲陰據此則
當加字讀矣六臣本音蓋誤認爲曲遇曹參傳曲遇師古音

曲爲邱羽反遇音禺與此無涉

梁王昌彭越 昌下當有邑字尤本不誤

太傅安國懿侯王陵 金氏姓曰王陵沛人此缺沛字

相國舞陽侯沛樊噲 金氏姓曰樊噲謚武侯不宜獨畧

曲周景侯高陽酈商 此高陽乃陳留郡雍邱縣高陽鄉酈氏

所居故商與食其皆高陽人非涿郡之高陽縣也又按商以

破滅荼功賜爵列侯食邑涿郡後以破黥布更封曲周漢志

曲周屬廣平國武帝建元四年始置爲縣則前此必是鄉名

而涿固縣也必無先封縣侯繼封鄉侯之事水經濁漳水注

云曲周舊縣非始孝武蓋以漢志爲誤耳

代丞相陽陵景侯魏傳寬 史記索隱謂陽陵屬馮翊楚漢春

秋作陰陵攷漢志馮翊之陽陵景帝陵也是故易陽景帝四

年更名安得高祖時先有茲稱且陵縣亦不以爲侯國也梁氏玉繩曰左傳襄十年陽陵注云鄭地釋例土地名云在潁北今在河南許州西北但景帝六年封岑邁爲陽侯見史記將相表若此侯封陽陵則至元狩初失國安得景帝又封岑邁可以驗非傳侯之封矣當作陰陵爲確史漢表傳並誤

中郎建信侯齊劉敬 水經河水注云建信縣漢高帝七年封婁敬爲侯國應劭曰臨濟縣西北五十里有建信城而史記劉敬傳云廼封敬二千戶爲關內侯號爲建信侯云云又功臣侯者表缺焉是與稷嗣君例也恐非

太子太傅稷嗣君薛叔孫通 漢書晉灼注引楚漢春秋曰名何當是初名漢拜通爲博士號稷嗣君張晏曰后稷佐堯欲令復如之孟康曰稷嗣邑名未知孰是

魏無知 唐書宰相世系表京兆王氏下云魏無知封高梁侯
新成三老董公 何校成改城各本皆誤史記正義引楚漢春
秋云董公八十三封爲成侯或云成侯董濞卽董公之子林
先生曰董公說高祖爲義帝發喪此漢興以來第一大事史
漢不爲立傳令人浩歎士衡列爲功臣信特識也

頌曰 六臣本校云五臣無此序

芒芒宇宙 六臣本芒芒作茫茫

駿民效足 胡公攷異曰駿當作俊善引俊民用章爲注可證
翰注乃云羣賢如駿馬足也攷士衡長安有狹邪行云憑軾
皆俊民左太冲擬士衡詩長纓皆俊人可見陸自用俊字與
此同彼二注善皆引尙書亦與此同決不得作駿甚明或言
駿字與足生義則上偶句云萬邦宅心萬字亦不與心生義

五臣雖緣足字改駿而殊非陸音也朱氏琯曰俊與駿同音可通詩長發鄭箋駿之言俊也本書求通親親表注引書克明俊德六臣本校云俊善作駿

注何常與關中卒 何校與改與陳同各本皆誤

平陽樂道 銑注曹參好黃老之術故云樂道

注論語曰貧而樂 案樂下當有道字今皇侃本高麗本俱有道字唐石經道字旁添本書幽憤詩注及史記仲尼弟子列傳引並有道字觀幽憤詩云樂道閑居此頌亦云樂道若引論語僅一樂字不足爲證矣

注卽欲捐之此三人 陳曰捐之下當重有捐之二字是也

銷印碁廢 余曰左傳楚人碁之注碁教也

五侯九集

注漢部五諸侯兵伐楚 五侯之說言人人殊應劭

以爲雍翟塞殷韓韋昭以爲塞翟殷韓魏如淳徐廣司馬貞
並以爲塞翟魏殷河南師古張守節並以爲常山河南韓魏
殷劉攽刊誤以爲河南韓魏殷趙吳仁傑補遺以爲塞翟魏
韓趙梁氏玉繩曰是時雍方被圍自不與其列塞翟殷河南
俱已亡國常山間關入漢安得有兵各家所數惟韓魏趙齊
爲可信蓋魏趙從軍皆見於其傳韓王之從軍見於月表合
齊擊楚見於淮陰傳是得四諸侯兵而其一必衡山也衡山
王吳芮之將梅鋗自高祖入武關時卽以兵從故令甲稱芮
至忠封長沙王則彭城之役有不屬在行間者乎

嘉慮四迴

又

規主於足

六臣本慮作聲於作以

注鍾離沐

何校沫改昧陳同各本皆誤

注以好遊出

陳校好遊二字互乙各本皆倒

注此特萬世之事也 胡公攷異曰萬世當作一力士三字漢書史記可證各本皆謬

哭高以哀 又摧剛則脆 六臣本哭作送剛作堅

京索旣扼 張氏雲玢曰漢書高帝紀應劭注京縣名今有大索小索亭晉灼云索音柵蕭何傳與項羽距京索間師古注索山客反今讀蘇各切者非其字亦應從索

威亮火烈 六臣本烈誤作列

注魏趙屬冀州齊代屬青州 陳曰代非青境亦當屬冀乃合張耳贊曰報辱北冀卽指平趙代事尤易曉也胡公攷異曰代字當在魏字下各本皆譌下文四邦魏代趙齊也可證念功惟德 五臣惟作推銑注可證

彭越觀時歿迹匿光人具爾瞻翼爾鷹揚 濟注陳涉初起或

謂越曰豪傑叛秦公可救之越曰兩龍方鬪且待之此謂張
匿後高祖擊昌邑越乃助之此謂鷹揚

觀幾蟬蛻 趙氏曦明曰觀幾當引易君子見幾而作蟬蛻當
引史記屈原傳蟬蛻於濁穢

保大全祚非德孰可謀之不臧舍福取禍 漢書班固述韓彭

英盧吳傳曰德薄位尊非祚惟殃

王信韓孽 漢書曰故韓襄王孽孫 史記韓信盧綰列傳同

而唐書世系表以信爲公子蟣蝨子林先生曰正韻謂韓王
信與淮陰侯同名嫌誤故改讀新此不知何據徐廣引楚漢
春秋謂韓王信一云信都史通雜說篇從之而譏馬班誤刪
一字索隱曰楚漢春秋謬韓王信初爲韓司徒誤爲韓王名
是也梁氏玉繩曰司徒之轉爲信都猶司徒之轉爲申徒勝

屠申屠也潛夫論氏姓篇及路史發揮言之尤詳

人之貪禍甯爲亂亡 林先生曰漢書韓王信與匈奴約共攻

漢以馬邑降胡盧綰亦亡入匈奴貪禍亂亡通結二人也

庸親作勞 五臣作作祚銑注可證按李注作字用崧高詩以

作爾庸鄭箋以起汝之功勞五臣改爲祚恐非

注高祖子弟弱 胡公攷異曰弟字不當有各本皆衍

注鋪敦淮墳 今詩常武墳作墳

雲驚靈邱 史記高祖紀云樊噲別將兵定代斬陳豨陳豨傳

亦云樊噲軍卒追斬豨於靈邱而樊噲傳轉無之則非噲明

甚史記絳侯世家及漢書傳是也又世家及傳並云靈邱而

紀言當城水經灤水注亦言周勃定代斬陳豨於當城蓋靈

邱當城皆代郡縣名因互見耳

景逸上蘭

注

定上谷右北平遼西遼東

今漢書作定上谷十

二縣右北平十六縣遼東二十九縣漁陽二十二縣而無遼

西此應從史記絳侯世家作遼西遼東二十九縣爲是遼東

止十八縣也

奄有燕韓

漢書周勃傳以將軍從高帝擊韓王信於代降下

霍人以前至武泉擊胡騎破之武泉北轉攻韓信軍銅鞮破

之還降太原六城擊韓信胡騎晉陽下破之下晉陽

絳穢紫宮徵帝太原

注

漢書勃曰臣無功請得除宮乃與太僕

滕公入宮戰少帝出

何曰案周勃傳臣無功二句乃東牟侯

興居語勃無此言自乃與太僕以下云云皆敘興居事與勃

無涉注誤引胡公攷異曰勃字疑又字之誤金氏姓曰勃遣

朱虛侯入宮擊殺呂產卽所謂絳穢也

扶功震主自古所難 漢書周勃傳人或說勃曰君既誅諸呂

立代王威震天下而君受厚賞處尊位以厭之則禍及身矣

勃懼亦自危廼謝請歸相印

掩淚寤主 六臣本寤作悟

振威龍蛻 注或曰龍脫 六臣本蛻作脫

攄武庸城 五臣庸作埔濟注可證

注厥兩兒棄之 六臣本厥作蹶是也尤本作取亦非

注晉灼曰今京師謂抱小兒謂擁樹 漢書注引蘇林曰南方

人謂抱小兒爲擁樹

陽陵之勲元帥是承 注屬丞相參殘博 毛本丞相作相國誤

也梁氏玉繩曰參時以右丞相屬韓信非相國也

信武薄伐揚節江陵 注漢書曰至致雒陽 陳氏兆崙曰江陵

當作臨江因臨江王都江陵而上文有別定江陵之語而誤耳按陵字於韻爲叶疑當仍舊

退守名都 六臣本守作宮

東規白馬北距飛狐卽倉敖庾據險三塗 尤本規作窺何曰時漢已虜魏豹禽趙歇河東河南河北皆歸漢何庸復杜太行之道以示諸侯形勢也燕趙已定卽代郡蜚狐亦非楚人所能北窺無事距守鹽關近太行之道何庸杜此兼據彼平與當時事實潤遠似後人依託之語梁氏玉繩曰此數語乃秦人規取韓趙舊談酈生仍戰國說士餘習滕口言之其說高帝說齊王皆用此語而胡三省則曰此酈生形格勢禁之說也蓋據敖倉塞成皋則項羽不能西守白馬杜太行距蜚狐則河北燕趙之地盡爲漢有楚將安歸乎

注據敖倉之粟 六臣本倉作庾是也師古曰敖庾卽敖倉也
今坊本改庾爲倉非

韜軒東踐漢風載祖 通鑑攷異云史漢皆以食其勸取敖倉

及請說齊爲一事獨新序善謀下分爲二分爲二者是

言祚爾孤

注

封其子爲高梁侯

漢書食其子名疥水經睢水

注云陳留風俗傳曰鄒氏居于高陽沛公攻陳留縣食其有

功封高陽侯是言食其及身爲侯也恐不足據

建信委輅

注

漢書婁敬脫輅

漢書傳及贊並作脫輅惟西

京賦云婁敬委輅幹非其譏解嘲云婁敬委輅脫輅

知言之貫

又附會平勃

漢書陸賈傳云名有口辨又傳贊云

陸賈位止大夫致仕諸呂不受愛賈從容平勃之間附會將

相以疆社稷身名俱榮其最優乎

無知敏猶昭奇跡 六臣本昭作照新唐書宰相世系表曰

魏無知封高梁侯今史記功臣侯者表無之且十二年酈疥

封高梁豈無知先已奪侯乎此當闕疑

紆漢披楚 六臣本紆作舒

袁生秀朗 胡公攷異曰袁當作轅注同序中作轅注引漢書

必與今漢書作轅者合

周苛慷慨 六臣本校云慨善作慨

貞軌偕沒亮節雙升帝嚳爾庸後嗣是膺 注漢書曰苛子成 至

與晏同誤也 按此四語通結紀信周苛兩人故注並引周成

紀通事而復辨紀通之誤也梁氏玉繩曰紀成以戰好時死

通乃成之子何得並爲一人明徐昌祚燕山叢錄言定州城

東三十里有固城父老相傳是高祖築以封紀信後者然無

確據恐不足信張氏雲璈曰頌文紀信周苛合爲一贊一燒一烹其死相似故也貞軌四句承上總言之特未明言信之無後耳李氏以士衡爲誤其實士衡未嘗誤也林先生曰班史輕節義故紀信周苛俱不立傳

天地雖順 六臣本地作命

皇媼來歸 顧氏炎武曰皇媼句失攷漢儀注高祖母起兵時死小黃作陵廟本紀五年卽皇帝位於汜水之陽追先尊媼爲昭靈夫人蓋先亡久矣而十年太上皇后崩則爲太上皇崩之誤重書而未刪也侯公說羽羽乃與漢約中分天下九月歸太公呂氏並無皇媼林先生曰此論實本晉灼如淳獨李奇以爲高祖後母蓋當時衆說原不一耳謹案史記項紀云歸漢王父母妻子高紀云取漢王父母妻子於沛又云項

王歸漢王父母妻子攷是時不特母媼已死卽孝惠亦未嘗
爲楚虜也史記信筆書之遂誤後人然月表及王陵傳但云
太公呂后又何嘗不分明乎梁氏玉繩謂馬班以漢人紀漢
書豈有不知高祖姓名之理乃太公不書名母媼不書姓豈
諱而不書如諸帝之不書名耶然諱名不諱姓母媼無姓又
何說皇甫謐謂太上皇名執嘉媼王氏名含始王符謂名媼
並見史注後漢書章帝紀注云名媼一名執嘉唐書世系表
云豐公名仁太公名媼字執嘉索隱又引班固泗水亭長碑
云母溫氏諸說不同真疑莫能明也張氏雲璈謂漢書楚元
王傳交高祖同父之弟也師古注同父明其異母旣言異母
則太公實有繼娶之子如太公之妾所生則於高祖當曰庶
弟不當云同父弟也李奇後母之說不爲無因

是謂平國 金石錄載金鄉守長侯君碑云侯公諡安國君趙
曰高祖紀侯公封平國此碑有安國既不同而平國君乃當
時稱號如奉春君之類碑以爲諡恐非

同濟天網 六臣本網作綱非也

東方朔畫贊

平原厭次人 注漢書地理志無厭次縣而功臣表有厭次侯爰
類疑地理誤也 按漢志平原郡富平縣注云侯國應劭云明

帝更名厭次水經河水注云漢書昭帝封張安世爲富平侯

薨子延壽嗣國在陳留別邑在魏都陳留風俗傳曰陳留尉

氏縣安陵鄉故富平縣也是乃安世所食延壽自以爲無功

德上書請減戶徙封平原十三州志云明帝永平五年改曰

厭次按史記高帝封元頃爲侯國

史表之元頃卽漢表之爰類

是知厭次

舊名非始明帝蓋復故耳道元所辨如此知厭次國除之後
仍爲厭次縣宣帝移富平侯國於此始去厭次之名至明帝
時復舊地理志不載厭次實誤故漢書東方朔傳師古注云
高祖功臣表有厭次侯爰類是則厭次之名其來久矣而說
者乃云後漢始爲縣於此致疑斯未通也

魏建安中

注

今云魏誤也

林先生曰以漢紀元而蒙魏號蓋

當時政自魏出久矣當塗之威福歷典午而猶埒人如此

不可以富貴也

六臣本貴作樂顏魯公書石亦作樂

故顏頎以倣世

顏魯公書石頎頎作傾抗

乃研精而究其理

六臣本乃下有不字

謝嘏豪傑籠罩靡前跽籍貴勢出不休顯賤不憂戚

顏魯公

書石嘏作哈無籠罩以下十六字

注天下大悅而將歸已視之如草芥又拔於其萃今孟子作
視天下悅而歸已猶草芥也於作乎

棄俗登仙神交造化 顏魯公書石作棄世登仙神友造化六
臣本交作變

此又奇怪惚恍不可備論者也 漢書東方朔傳贊云後世好
事者因取奇言怪語附著之朔故詳錄焉師古注言此傳所
以詳錄朔之辭語者爲俗人多以奇異妄附於朔故耳欲明
傳所不記皆非其實也而今之爲漢書學者猶更取他書雜
說假合東方朔之事以博異聞良可歎也

大人來守此國 注此國謂樂陵也其父爲樂陵郡守史傳不載
難得而知也 本書夏侯常侍諫云父守淮岱治亦有聲注引

王隱晉書云夏侯威字季權歷荆兗二州刺史威次子莊淮

南太守莊蓋卽孝若父淮謂淮南岱卽樂陵是夏侯莊更爲樂陵守王隱書失載耳

注馮翼遺像何以譏之 今楚辭天問遺作惟譏作識

進亦避榮 六臣本亦作不

涅而無滓 注論語子曰涅而不緇 臧氏琳曰古論作涅而不

緇魯論作泥而不滓史記屈賈傳後漢書隗囂傳皆引之 韋氏灝曰論衡新語筆解文選座右銘緇俱引作淄隸釋州輔碑涅而不緇涅卽涅緇卽緇費鳳碑作涅而不滓蓋用涅而不緇其字有不同若非假借則是傳授異也

樂在必行處淪罔憂 六臣本作在樂必行淪作儉按顏魯公書石淪亦作儉

注不可得而治也 今孟子不上有民字

周旋祠宇又悠悠我情 六臣本旋作游情作精顏魯公書石亦作游

三國名臣序贊

袁彥伯注檀道鸞晉陽春秋 晉上應添續字去春字

注爲東郡守 此四字當依尤本改作爲大司馬府記室參軍

稍遷吏部郎出爲東陽郡守卒二十一字

注三國魏蜀吳也至言并序也 此二十九字爲濟注錯入尤

本無之是也

夫百姓不能自治 晉書文苑袁宏傳治作牧

遭離不同跡有優劣 六臣本遭上有雖字跡上有且字晉書

亦有雖字

風美所扇 五臣美作靡翰注可證

故二八升而唐朝盛 六臣本朝作堯

注三黜之 陳校去之字各本皆衍

保持名節 又古之流也 又漢之得材 六臣本名作明晉書也

作矣材作賢

注盍遠續禹功 胡公攷異曰續當作績謹按本書五等論注

引績字不誤

抑亦可以爲次也 今論語也作矣

遭時匪難 六臣本匪作不毛本亦作不晉書作匪

注齊人有言 又雖有鉉基不如待時 今孟子言下有曰字漢

書樊鄴滕灌等傳贊引鉉基作茲基待作逢禮記月令正義

齊民要術說文解字廣雅唐書隱太子傳贊基均作鉉

亦異世一時也 六臣本無也字

文若懷獨見之明

又

故委而斷朝豫議世事

又

源流趣舍其亦

文若之謂

又

將以文若既明

晉書獨見之明作獨見之照而

作圖議作謀其作抑六臣本趣作取既明下有且哲二字何

白晉書有且哲是妄人謬加

夫仁義不可不明

又

生理不可不全

又

則崔子所不與魏武所

不容

六臣本兩可字下並有以字兩所字下並有以字晉書

子作生

而名教束物者乎

六臣本物作拘

雖古之遺愛何以加茲 三國蜀志陳壽上諸葛亮集表云亮

病卒黎庶追思以爲口實雖甘棠之詠召公鄭人之歌子產

無以遠譬也

臨終顧託

又

武侯處之無懼色

又

六臣本託作命處作受

注尚書曰成王將崩 陳校書下添序字各本皆脫

豈徒蹇愕而已哉 五臣蹇作蹇銑注可證毛本傳作謬誤也

注中數愕字尚不誤晉書作蹇謬

所照未異 六臣本照作昭

注漢書高祖功臣頌曰 書字不當有各本皆

或以述德顯功 又以為之讚云 晉書述作紀六臣本為上無

以字

魏志九人 至字元伯 此一百五十字六臣本校云五臣本無

晉書亦無何曰不及幼安當以其不得而臣也

袁渙字耀卿 六臣本渙作煥張氏雲璠曰按蜀志許清傳與

東萊袁煥親善字亦作煥詳其字曰耀卿自當從火且煥父

名湧不應煥名亦從水也

注杞良材也 杞下當有梓字各本皆脫

嶺無亭菊 又探賾賞要 晉書亭作停按亭停古今字下文跡不斲停疑李亦作亭與晉書同五臣探賾作賾奇翰注賾求也晉書亦作賾奇

注太公往弔之 胡公攷異曰往當作任此引山木篇文

滄海橫流玉石同碎 晉書同作俱晉書王尼傳云滄海橫流處處不安抱朴子正郭篇云猶恐滄海橫流吾其魚也始教生人 晉書人作靈下文器同生民晉書民作靈疑此李

亦作民

注楞里之智也使知國若葬吾以疾爲誓蔡也 今法言淵鑑篇里下有子字若作如知吾上有則字蔡作龜無也字

注右尹革曰 陳校尹下添子字各本皆脫

知能拯物愚足全生 五臣拯作極向注言其內智筭能極於物而外貌似愚按極非拯是言拯物救世也序言公達其亦文若之謂者也向注失其本意今晉書作極亦誤

注 渙爲郾中令 前作袁煥此後注中又煥渙錯出按作渙是也應畫一從魏志改

仁者必勇 魏志袁渙傳帝問渙從弟敏渙勇怯何如敏對曰渙貌似和柔然其臨大節處危難雖賁育不過也

牆宇高疑 晉書宇作岸

恩樹芳蘭剪除荆棘 魏志崔炎傳注引先賢行狀曰魏氏初載委授銓衡總齊清議十有餘年文武羣才多所明拔

和而不同通而不雜 魏志徐邈傳盧欽曰往者毛孝先崔季珪等用事貴清素之士于時皆變易車服以求名高而徐公

不改其常故人以為通比來天下奢靡轉相倣效而徐公雅尚自若不與俗同故前日之通乃今日之介也

嘉謀肆庭讜言盈耳 魏志陳羣傳注引魏書曰羣前後數密陳得失每上封事輒削其草時人及其子弟莫能知也論者或譏羣居位拱默正始中詔撰羣臣上書以為名臣奏議朝士乃見羣諫事皆歎息焉

全身由直 晉書由作曲

敬授既同 六臣本授作愛是也此傳寫偶誤耳何校授改愛云從晉書按晉書作愛敬

注散騎常侍王素 何校素改業陳同各本皆誤

臨危致命盡其心禮 魏志陳泰傳注引魏氏春秋曰帝之崩也陳泰枕帝尸於股號哭盡哀遂嘔血薨

苟非命世

注

其間必有名世者廣雅曰命名也

案本書西征

賦杖命世之英藹注引孟子作命世漢書劉向傳贊引傳曰

三國志荀攸傳注引傳子曰皆作其間必有名世者說文名

自命也命名古義蓋通

注

孔安國尙書傳曰寡陰氣也

太常公曰今尙書無寡字當

是尙書大傳鴻範五行傳厥咎注也然大傳是鄭注未聞

安國亦有傳謹按尙書洪範曰蒙孔疏引鄭王義俱作注是

古文尙書原是寡字今本作蒙者蓋衛包所改歟

注

爲軍中郎將卒

何校軍下添師字陳同各本皆脫

不忘中正豈曰摸擬 六臣本中作忠摸作謨毛本摸作模晉

書亦作模

注

子曰君子其行己也恭

此是節引

公衡仲達 六臣本及晉書仲作冲此傳寫誤

注命昭爲良史 何校良改長陳同各本皆誤

吳魏同寶 濟注吳魏先同起兵以平天下故云同寶按子布

後勸吳迎魏故謂之同寶耳序言登壇受譏是也濟注非

注弟權託昭 六臣本弟上有以字

才爲世出 六臣本出作生晉書亦作生

荷檐吐奇 六臣本檐作擔校云善從木按從木是也古檐負

多用此字羣經音辨木部檐荷也都濫切詩箋檐負天之義

祿其明文也銑注改從才晉書亦作木

子瑜都長 注謂體貌都閒而性情長厚也 張氏雲璈曰下云

體情純懇不當先言長厚蓋言貌都閒身長大耳

伯言蹇蹇又入能獻替 五臣蹇蹇作響響向注可證晉書作

方選方訓卷三十一
三
簪簪六臣本能作亦晉書作入亦贊替

質無塵玷 晉書玷作點

立上以恒匡上以漸 何校作立行以恒匡主以漸據晉書改也六臣本亦作立行

清不增潔濁不加染 此後漢書郭太傳所云澄之不清擾之不濁也

仲翔高亮 又說說眾賢 六臣本高作貞說說作莘莘

尙想重暉 六臣本晉書重暉並作遐風